

Ministarstvo privrede

Na osnovu člana 66. stav 1. i 3. Zakona o organizaciji organa uprave u Federaciji Bosne i Hercegovine ("Službene novine Federacije BiH", broj 35/05), a u vezi sa članom 68. stav (3) Zakona o lovstvu ("Službene novine Federacije BiH", br. 4/06, 8/10 i 81/14), ministar privrede Kantona Sarajevo donosi

IZMJENE I DOPUNE

MJERA U CILJU SPREČAVANJA ŠTETA OD DIVLJAČI I NA DIVLJAČI

Član 1.

(Dopune člana 4.)

U članu 4. Mjera u cilju sprečavanja šteta od divljači i na divljači ("Službene novine Kantona Sarajevo", broj 18/07) u stavu (1) tački b) iza riječi: "pletiva" dodaju se riječi: "najmanje visine 110 cm".

U istom članu dodaju se novi st. (2), (3), (4), (5) i (6) koji glase:

- (2) "Ukoliko je poljoprivredna ili šumska kultura ograđena bodljikavom žicom, ista mora biti najmanje visine 110 cm sa pet struna žice koje su postavljene na međusobnom razmaku od 20 do 25 cm.
- (3) Učinkovite ograde moraju biti postavljene na stubove najmanjeg promjera 5 cm i sa međusobnim razmakom između stubova od 150 cm do 200 cm.
- (4) Nema odgovornosti za štete ukoliko parcela nije ograđena učinkovitim ogradom odnosno ukoliko je ograđena plastičnim mrežama (npr. protiv gradna mreža, plastična zaštitna mreža sa sportskih terena, plastične trake za obilježavanje i sl.).
- (5) Zabranjena je upotreba tzv. žilet žice, te ukoliko je oštećeni koristio ovu žicu nema odgovornosti za štetu.
- (6) Uz prijavu za štetu na poljoprivrednim kulturama, prilaže se dokaz o pravu korištenja zemljišta na kojem je nastala šteta, a pravo korištenja dokazuje se kopijom katastarskog plana i prepisom posjedovnog lista, ugovorom o zakupu ili ovjerenom izjavom o davanju zemljišta na korištenje sa kopijom katastarskog plana i prepisom posjedovnog lista."

Član 2.

(Izmjena člana 7.)

Član 7. mijenja se i glasi:

"Član 7.

- (1) U cilju sprečavanja pričinjavanja šteta od divljači i na divljači, vlasnik stoke koja se nalazi na ispaši kao i na počinku dužan je obezbijediti slijedeće:
 - a) čuvati i redovno kontrolirati stoku i u slučaju pojave šteta od divljači odmah, a najkasnije tri dana od dana nastanka štete pismeno obavijestiti Ministarstvo privrede Kantona Sarajevo,
 - b) da stoka u vrijeme počinka ili odmora, bude zatvorena ili obezbijedena u odgovarajuće objekte izgrađene od materijala koji divljač ne može rušiti, a koji trebaju biti obezbijedeni odgovarajućim vratima sa sigurnim zatvaranjem što se odnosi i na objekte u vidu torova (obora) i sl.,
 - c) objekti u kojima se stoka zatvara, a koji imaju prozorske otvore isti moraju biti obezbijedeni sa odgovarajućim prozorskim krilima ili poklopcima sa sigurnim zatvaranjem izrađenim od drveta, armaturnih mreža ili drugog čvrstog materijala koji onemogućava ulazak divljači,

- d) stoku ispuštati na ispašu samo na površinama dozvoljenim za pašu,
 - e) stoku ispuštati na ispašu pod kontrolom i uz stalni nadzor i obezbijedjenje čuvara. U skladu sa zakonima o veterinarstvu, pojam čuvar označava svako fizičko ili pravno lice koje ima odgovornost, čak i privremenu za životinje, uključujući i transport na pijacu ili klaonicu,
 - f) da stoku na počinku i ispaši (kopitare i papkare) pored čuvara čuvaju i ovčarski rasni psi što se dokazuje rodovnikom za pse,
 - g) da ovčarski psi smiju biti u lovištu samo uz stado,
 - h) da se stoka ne ispušta (niti prolazi radi ispaše) na poljoprivredno zemljište i u šumu i šumsko zemljište ukoliko to nije odobreno od strane vlasnika ili korisnika zemljišta što se dokazuje ovjerenim ugovorom ili drugim aktom o korištenju zemljišta,
 - i) uz stoku tokom noći ovčarski psi moraju biti zatvoreni u prikladne boksove ili odgovarajuće ograđeno dvorište, staju ili tor minimalne visine ograde 180 cm,
 - j) čuvati i redovno kontrolirati pčelinjake i u slučaju pojave šteta od divljači odmah, a najkasnije tri dana od dana nastanka štete pismeno prijaviti štetu Ministarstvu privrede Kantona Sarajevo,
 - k) pčelinjak treba da bude ograđen učinkovitim ogradom iz člana 4. ovih mjera,
 - l) pčelinjaci se mogu postavljati na vlastitom zemljištu ili na zemljištu u posjedu drugih pravnih ili fizičkih lica uz saglasnost istih. Pravo posjeda dokazuje se kopijom katastarskog plana i prepisom posjedovnog lista, ugovorom o zakupu ili ovjerenom izjavom o davanju zemljišta na korištenje,
 - m) perad mora biti u peradarniku ili zatvorenom dvorištu, a ako se perad nalazi izvan dvorišta mora biti čuvana.
- (2) U planinskim i drugim izdvojenim područjima gdje se mogu očekivati ili se učestalo pojavljuju vukovi, stoka u toku noći mora biti zatvorena u staji ili u odgovarajuće zaštićenom toru minimalne visine 180 cm odnosno odgovarajućoj električnoj ogradi, a u toku dana, ako su na ispaši mora stalno biti pod nadzorom čuvara (pastira) i ovčarskog psa čuvara i to:
- a) za stada do 50 grla - 1 ovčarski pas čuvar,
 - b) za stada od 50 - 150 grla - 2 ovčarska psa čuvara,
 - c) za stada preko 150 grla - barem 3 ovčarska psa čuvara.
- (3) Troškovi veterinara i lijekova, odobravaju se do vrijednosti usmrćene životinje".

Član 3.

(Izmjene člana 9.)

U članu 9. iza stava (1) dodaju se novi st. (2), (3) i (4) koji glase:

- (2) "Oštećeni koji prekorači rok za prijavu štete, gubi pravo na sporazumno utvrđivanje nadoknade štete.
- (3) Oštećeni je dužan poduzeti mjere zaštite za očuvanje tragova na mjestu na kojem je nastala šteta.
- (4) Oštećeni ne smije poduzimati radnje kojima bi se uništili tragovi na mjestu nastanka štete."

Član 4.

(Stupanje na snagu provedbenog propisa)

Ove izmjene i dopune mjera stupaju na snagu osmog dana od dana objavljivanja u "Službenim novinama Kantona Sarajevo".

Broj 07-01-02-7897/15

11. maja 2015. godine

Sarajevo

Ministar
Dr. Muharem Šabić, s. r.